

醫鏡卷之三

十經樓

金沙王肯堂宇泰父著

茂苑張暎垣玄暎父叅

武水蔣儀儀用父較

麻木

人皆以麻木爲一病。而不知麻與木固自有不同也。所謂麻者。非痒非痛。肌肉之內。如千萬小蟲。亂行雜沸。按之不止。搔之愈甚者。是也。所謂木者。不痒不痛。自己之肌肉。如他人之肌肉。按之不知。搔之不覺者。

是也。麻如麻之亂，故名曰麻。木如木之厚，故名曰木。麻猶知痛痒，而木則全無所覺矣。然未知其病之所屬，將何以斷之。蓋麻有久暫，木亦有久暫。暫時之麻者，或因坐臥不得其所，四體相壓，阻抑榮衛，血行既遲，而氣亦未至故也。然麻或太甚，亦有似于木焉。暫時之木者，亦因坐臥不得其所，四體重壓，又着寒氣，不時不曾護持，而榮衛不相聯屬，血已不行，而氣久不至故也。然木或還醒，亦有似乎麻焉。此其暫時之麻木，雖因氣血不足，而猶未足爲病。惟久麻久木者，

斯爲病耳。蓋經年累月無一日而不麻者。麻之久者也。麻之久者。非坐臥不穩所致。必其內氣虛甚。風痰奏之。痰本不能作麻。以其挾于風邪。痰爲風所噓。如風吹波浪。自騰沸而起。肌肉之中已爲風痰所據。陰陽二氣失其運行之柄矣。安得而不麻乎。經年累月無一日而不木者。木之久者也。木之久者。亦非坐臥不穩所致。乃是死血凝滯。入內外挾風寒。又因陽氣虛敗。不能運動。而肉已死。若血與我不相干。此其所以木也。人之一身皆氣血所養。氣血行遲。卽能成病。

況其不行乎此久麻久木之所以可畏也。然麻木之處小猶可治之。若半體一肢決難救療。醫者知此則人之死生病之輕重了然于胸中。而用藥之妙尤在于善變其可以執泥耶。設使暫麻暫木而用重劑則損其真元。久麻久木而用輕劑則不能取效。審而治之可也。

藥例

大法麻木之病雖有風痰死血之分。然治療之藥皆當以熱藥爲向導。如生姜附子官桂川烏之類。以

引經藥引至各經如手臂用桑條股足用牛膝威
靈仙之類以行氣藥通其氣如烏藥木香枳殼青
皮之類以通竅藥開其經絡如木通川山甲牙皂
之類有痰則去痰有風則去風有血則行血此其
總綱也。

久麻者皆氣虛爲風痰所襲也。雖係氣虛亦不暇補
其氣。一補其氣則風無自而散。痰無自而去矣。宜
以生姜爲向導。枳殼以開氣。半夏南星以去痰。防
風荆芥羌活以散風。牙皂木通以通經絡。手臂用

桑條股足用牛膝以引經待其病減然後用參芪白朮茯苓艸之類以補其氣可也。

久木者皆陽氣不運死血凝滯外挾風寒所致也宜以附子官桂之類爲向導烏藥木香之類以開氣川山甲木通牙皂之類以通經絡當歸桃仁蓬朮紅花阿魏之類以消血因其病之所在以引經藥引之如桑條牛膝之類待其病減以八物湯補其氣血可也。

背上麻木以羌活爲引經胸前麻木以桔梗爲引經。

面上用升麻爲引經。風用風藥。痰用痰藥。血用血藥。皆以開氣爲主。而此三處。惟以生姜爲向導。而附子之類。不必用也。

遍身肌膚大麻木。淫淫然如蟲行者。風也。宜以姜蠶爲君。羌活防風爲佐。烏藥以勻氣。木通以開經。生姜爲開導。蓋木通能行十二經絡。烏藥能行一身之氣。生姜能開一身之湊理。羌活防風能去一身之風。而姜蠶一味。專治如蟲行者之聖藥也。至于加減輕重之劑。則存乎其人耳。而豈吾之所能備。

述者乎。

痞塊

痞者。否塞之意也。從病從否。故有痞之名焉。又以其堅實有形。故又名之曰痞塊。然是物也。從何而得哉。蓋因死血不化。宿食不消。痰飲積聚而成者也。有三者併而成塊。有三者各自成塊。各自成塊者。易治。併而成塊者。難治。然果何以辨之。察其脉。視其形而已矣。脉弦爲痰。脉滑爲食。脉芤爲血。三脉俱見。則并而成塊也。以其形而定之。宿食成塊者。居于中脘。視之則無形。按之則有質。在腸胃之間者。以人之飲食皆

入于胃故不在皮裡膜外其在皮裡膜外者皆痰與血也蓋痰能流注于脂膜血能運行于皮肉痰積而不流則脂膜之間爲其所據而有形可見血瘀而不行則皮肉之間爲其所礙而亦有形可見也欲辨痰與血之異亦審其痛之何如耳痛甚者爲血痛不甚者爲痰又手推不動者爲血手推易動者爲痰以熱物熨之而痛緩者爲血熨之而若無所覺者爲痰此痰與血之辨也若痰與血相成者何以辨之塊之以漸而大者是也蓋先有死血而又有痰以裹之則以

漸而大。先有積痰。而又有血以并之。亦以漸而大。若
單是血。或單是痰。無相裹相并之物。只如初起之形
而已。何至以漸而大乎。然宿食成塊。亦未有不資于
痰與血也。何也。蓋飲食所傷者。惟中脘作痛。或按之
硬實而已。初未嘗如彈丸之形也。使不資于痰與血。
何以成塊乎。必先有硬飯。或魚與肉。或餛飩米團之
類。一時失嚼。誤咽停于胃中。經月不能消化。碍其道
路。血流過其處。必裹一層痰。或經其處。又裹一層痰。
與血互相裹之。則不能不成塊矣。裹一層。則大一層。

故始如彈丸久則如杯如碗其初尚小隱于胃中猶有質而無形其後漸大則腹皮頂起而形外見矣又有時升時降時見者乃氣塊也或左或右或上或下按之不見其塊不按又若有形而漉漉作聲者乃停飲也非塊也此統論其塊云耳然以其在人而言則雖各有專病而又不可拘也如婦人之塊多惡血而亦有氣成者小兒之塊多食積而亦有痰成者易怒之人多氣癖而亦有血成者肥胖之人多痰飲而亦有食成者醫者當問其得病之繇或偶傷食自此日

而起者。或偶受氣自此日而起者。或偶負重勞力自
此日而起者。或平素有鬱痰固結。偶發作而起者。在
婦人必審其月事之通閉。在小兒必審其飲食之多
寡。皆當以意求之。不能盡述也。大法治一切痞塊。皆
以開鬱行氣爲主。又各隨其症而用主治之藥。佐以
破結軟堅之味。則得之矣。其有癰塊成龜盤之形。如
能行動者。又不獨以塊治。當自有藥以消之也。

藥例

死血成塊者。以消血爲主。

用桃仁紅花山查蘇木血見愁之類。以消血。三稜蓬朮之類。以消堅。青皮烏藥香附枳殼之類。以開鬱行氣。共成一劑。以好醋五六碗。煮乾爲末。卽以醋糊爲丸。隨其塊之上下。以時之饑飽服之。好酒送下。二百餘丸。一日二服。所以必用醋者。取其酸能破結也。

痰飲成塊者。以化痰爲主。

用半夏南星瓦壘子灰青礞石海浮石之類。以化痰。加三稜蓬朮香附青皮之類。亦以醋煮爲丸。如

前服之。

食積成塊者。以消食爲主。

用黃連枳實檳榔艸菓山查萊菔子阿魏之類。以消食。仍加三稜蓬朮青皮香附之類。用醋煮乾調神曲糊丸。

痰血食積相裹而成塊者。

用海浮石瓦礫子礞石之類。以消痰。枳實萊菔子檳榔艸菓之類。以消食。桃仁當歸紅花之類。以消血。仍加三稜蓬朮青皮香附并木香之類。醋煮丸。

之。

諸氣成塊者。以破氣爲主。

用官桂木香青皮枳實香附之類。以破氣。仍加三稜蓬朮醋煮丸之。

停飲作塊者。以泄水爲主。

用甘遂芫花大戟之類。以泄水。佐以順氣之藥。如烏藥青皮枳殼木香之類。使從大小便而出。

癖塊之形。如龜鱉狀。而能行動者。乃是食積死血相

裹而成也。以其日月既久。藉人之氣血養之。故成